

陸川縣志卷十七

藝文志

文以載道宣德而達情治化之羽翼也自古名公鉅卿忠臣孝子以及騷人遊客或融境成聲或因言寄托著述富矣然必有功名教有關風土并邑中名勝始登諸乘若夫風雲月露雖達人名作暨置弗錄後之覽者其鑒余之意也夫

重建陸川縣儒學記

陸川縣儒學舊在城南一里所興建者屢矣天順間知縣李瑄始遷置城南門內縣治之東堂殿齋廡茅舍竹籬相間逼近民房非惟不足以及妥祀聖賢而師生朝夕講誦亦無所止息上下病之孟中稟命督學謁廟之日徘徊周覽大懼無以稱上昔既退諸生請曰學舍近民居湫隘殊甚迂復舊所便余躬謁自視已謂諸生曰茲地盜賊淵藪前之興廢不常者職此之由可再誤耶圖所以重建者而難其費校士之餘爰請於巡撫秦公絃曰前都御史朱公發銀六百兩修貴縣學宮今尚存二百兩願舉此以給之公慨然許之遂下梧州府知府何珣如檄施行因地畫圖授同知李智督訓導彭鑾典史唐聰鳩工市材先建聖殿兩廡次明倫堂櫺星門戟門集賢門神厨會饌堂以次建立不侈不陋有嚴有翼庶足以訓聖朝建學育才之意今知縣莊槩後飭而美之制度大備偕訓導彭鑾具事狀請記予惟陸川僻處萬山之中界乎兩粵四面皆通道之區民易煽以亂非教之詩



書禮義何以易強悍之俗為仁厚之風學校者詩書禮義之所自出  
 司牧民者可緩耶今都御史秦公倡於上同知李公奉行於下皆可  
 謂知務矣陸川人士可不思所以自勵乎勵之當何如必也諸書以  
 明道至誠以達本尊君而親親重義而輕利寧直而死不曲而生推  
 是心以往無不可矣雖然陸川之民素易與為義往年草寇竊發  
 予與憲使陶君魯僉事黃君鑰謀所以治之既而庠生周南興省  
 祭官何請以計斬其渠魁以獻地方遂寧後竟為賊所害若人非易  
 與為義者耶嗚呼陸川之民其易與為義也夫如此矧服學校詩書  
 禮義之教而自勵焉者異時出而仗大節為臣死忠為子死孝顧不  
 尤易也哉宏治十四年辛酉仲冬穀旦

### 重遷陸川縣文廟記

明邑令張子翼

陸川學宮舊建於城之東南國朝天順六年一遷於南門內縣治之  
 東宏治中提督學周公以其堙塞隘陋不足安祀聖賢也再遷於縣  
 中街西至今上御極之二十二年知縣李君綽又遷於縣南里許十  
 餘年來雖屢經修葺而牆垣究不免於圻傾者地基之低濕故也辛  
 酉春予余奉命宰陸甫下車躬謁先聖睹茲光景蹙然不安已萌遷  
 建之意第以入闈分校未暇舉行揭曉後復回任所而學宮既燬於  
 流寇矣四顧徬徨不勝鞠為茂草之感遂揖搢紳士人而進之告以  
 遷建之謀莫不忻懽踴躍願舉斯役於是相與於度基地擇城北爽  
 壇之地而決計遷建焉既又思工費浩繁非藉眾努力無以濟也因



捐薄俸以為闔邑倡而生員李居欽慨然捐金貳百兩邑中人士亦陸續捐資相助共得白金五百兩有奇用是鳩工庀材諏吉於癸亥冬十月堂殿齋廡以次棟築迨明年春二月聿觀厥成矣當奉主陞座之辰邑中人士濟濟踴躍來與行釋奠禮予復揖而進之曰方今用人之道由於科第而未俗苟且讀聖賢書初不身體力行徒以記誦詞章雕繪字句為弋取科第之具由是風俗人心都不可問論者遂謂科第而士習壞焉不知士習之壞非闕科第也自古科第取士之法或以詩賦或以策論其途不一我大祖高皇帝撫有四海定以制義取士蓋欲多士沉浸於聖賢之義理以養其德性而由是以升聖賢之堂入聖賢之室固非多士之記誦詞章雕繪字句已也諸君

子讀聖賢書誠深思夫古聖賢之所以血食千秋與天地同其不朽者何在而盡五倫修五事務求踐乎士之實稱乎士之名非惟有以仰詞聖朝作人之至意抑且入廟而對越聖賢亦可以無慚色矣又安見科第之足以壞士習乎哉僉曰然遂書以為記嘉靖四十三年甲子仲春

名宦鄉賢祠記

明五林州學正 廣東南海人 倫 詔

明嘉靖丁亥秋陸川名宦鄉賢祠成先是禮部奏准通行天下而欽差提督學校唐琮申諭各府州縣本司奉行唯謹蓋表彰賢哲以風勵將來甚盛典也陸川縣漢合浦地宋屬越州唐屬容州宋仍唐舊至明洪武十年始隸梧州當兩廣交會之衝有妙峒溫泉之秀風俗



漸美人才日興蓋自漢唐宋以來食祿是邑而政教可稱生長是邦而才行可錄者第以屢厄兵變記載弗詳考諸舊志如名宦則有道州吳庸以宋淳熙特科為都簿尉適李接倡亂統兵禦之六戰報寡不敵歿於陣節兵日月爭光帥劉焯上其事贈承事郎仍官其子明洪武初長沙王麟以卓犖之才筮仕邑丞興創之初能阜民利物秩滿之日保升邑長泉州莊槩成化己巳授戶來任簡易近民六事畢舉凡載榮歸民不忍舍臨安即珍宏治己丑拜官邑宰廉明仁愛修築城垣解綬之日民皆感仰南海彭金職曾縣尉志存經濟催科不授撫字有方嗚呼官績有名聞者固不止此而此數君子則遺愛之在民心者也鄉賢則油鳳以洪武丁卯登鄉進士初授肇二守而德政咸孚後改諒州守而士民愛戴楊榮發跡賢科職任同府初任廣州而政事不肯繼至瓊郡而廉明昭著龐經則文學俱優師儒不忝鄉薦政事長於別駕嗚呼人才有譽望者固不止此而此數君子則賢聲之尤著者也名宦鄉賢生有功德於世歿當廟祀不絕蓋功德自有公論焉耳前令以邑僻處一方漫不加意比龍川何侯至邑方釋畢慨然嘆曰十室之邑猶有忠信是邑雖小豈無賢哲乃奉宗主條約廉得來官與鄉宦之可畏敬而足垂範者若干人題其姓名官秩於木牌以表其賢欲分為二祠而學地狹隘求之地又非崇重之所於是移登學門於明倫堂之東面然後闢地於明倫堂之西面擇材庀工并名宦鄉賢而一創之於是歲之春迄秋七月而祠宇始翼神



樓既奠祀事攸行勤諸金石以告後人徵文於詔詔曰同學享祭每拘於迹毋泥於勢而惟其功德之相著也之數賢者世之相後不止百年地之相去千有餘里雖仕路有通遐遭逢有夷險而發跡崇卑之頓殊其功其德均無愧於天下後世矣俎豆登降之間不識觀者亦為之動容乎庸書此以復何侯之命

修陸川縣陽城記

邑教諭

梁維芳

易曰王公設險以守其國城池之設由來舊矣陸川古百粵地肇創沿革備載於籍我朝洪武初改屬梧州土城規制永樂年間傾圮成化時砌以磚石周圍覆蓋串樓通衢南北基址低薄不旋踵而欹墜矣連年修葺勞民傷財邑之父老僉謂必得廉明方能變通以綜

理也歲戊辰明府周公來蒞公明練達甫下車廣詢民瘼區其緩急察其利害一切使民宜俗作興士類者無所不用其極迨是庶務畢舉政通人和士民興化一日公暇登樓顧閱見城垣崩頽病於防守而宰是者亦難之矣也公感然嘆曰城池護衛長府黎庶事勿容緩遂擇吉詳請於當道允之築以陽城是用有蠱飭之變舉廢莫定焉乃動支帑金親為庀材鳩工不辭勞瘁不憚旁午凡百工費不足捐俸補之不動聲色庶民子來數月之間城郭峻絕巍峩翼然鞏固革故鼎新落成於今日矣基濶二百六十餘丈高二丈有奇加崇於舊四圍建高鋪敵臺兩樓包護子城勢安如山門北額匾曰拱極南曰嚮明規模宏壯雖金城千里都城百雉不是過也迄今居民貼席境



內晏然即間有突寇之侵坐享無虞公之豐功偉績不且與古勲至  
比隆也哉陸之卿士大夫以暨百姓莫公之德仰公之功情不能慙  
屬余言而銘諸石余不佞敢默默以寢公之美耶南山之雅云樂只  
君子民之父母公其民之父母與樂只君子德音不已公其德音不  
已與猗與祝公之惠與城並厓祝公之功與城並高祝公之聲名與  
城千萬年同悠久矣公名文字述甫江西雩都人別號屏石於戲公  
德澤行膾炙人口江津喬嶽未能悉揚厥休特綴數言用誌甘棠之  
慶

裁城北稅廠記

邑歲貢 李昌祚

予老而善病杜門抱膝外他所弗聞也邇來謝使君甫下車別陋規  
却苞苴予聞且喜然猶未敢遽定其為賢也邑有稅額列南北二廠  
去城數武者曰南廠司之者猶畏法知職其北廠去城二十里諸役  
縱恣雖斗粟只雞之微必征商民苦之已匪朝夕必有來告者曰使  
君裁北廠稅矣予曰得毋奉憲令乎然他邑都有何獨去此得毋好  
名乎且此廠之稅倍蓰於南謹俟之懼其或無以為人也未幾通詳  
成案矣未幾勒石永禁矣於是心折其賢而樂聞所未聞也念自下  
車至今方期月耳平反鋤奸子我元元若干鉅條次第修舉不賢者  
能如是乎今且有事邑乘以創昔之所未創誠哉其賢於前人多矣  
乃命二子炘與焮曰纂修之舉政體攸闕徃欽哉以共襄乃公毋辱  
使君命寄語使君予毫且病筆花久秃不堪繪化理以為者謹獻野



忱命季男嗣錄附志未敢為佞也蓋冀將來以賢勸賢云

重修學宮碑記

龐景軒

陸川學宮其建也不一時其遷也不一地而重建於茲所也則自順治丙申以迄今茲垂三十載矣廟貌弗崇子矜寥落加以偽變兵燹之後風雨剝侵椽題朽蠹不能歸然作法魯靈光良可慨已迨邑侯衛公諱康穆蒞任以來他務未遑首以興學造士為己任越明年政暇人和遂出俸薪為紳士勸謀所以庀材鳩工無何事甫興而公以老告致矣會臨桂二月馬公諱圖文學篆茲土愛民重士輒慨然捐資以成厥美馬穎承二公命不憚煩瘁與傅子颺貞董督是役材取維良工期孔固而役夫則資於衆均而不擾經始於乙丑年正月告成於五月殿宇門牆規模宏偉煌煌乎大非昔日之觀矣諸君子屬余為文記之余謂人才之盛衰闕乎學校之興廢然其廢也不自廢必有所以致其廢其興也不自興必有所以使之興往歲甲子皇帝東巡謁先師於闕里行祀禮于家廟而又頒修學宮之詔於郡國其重師儒興學校詢追三代而軼兩漢矣今二公皆能體

聖天子之心以為心或創於前或成於後而都人士亦能體二公之心以為心彼供其力此效其財不數月而聿觀厥成爰侑

先聖昭崇道化豈無所使而然與由是崇廟禮難窺而宮牆在望諸士子肄業其間沐浴於聖人之澤游息於道德之場仁漸義摩禮陶樂淑涵濡日久當必有人文蔚起俊傑挺生後先濟濟出則為國家



之名臣處則為鄉黨之善士才由斯盛俗由斯美無負一  
盛世右文之雅化暨二公建學育才之美意則幾矣眾友曰然請誌  
之以作左券用垂不朽康熙二十四年歲次乙丑孟夏

### 修聖廟記

雍正三年秋九月予抵任之次晨謁先師廟展拜之餘見櫺折椽  
摧傳草叢棘都無善狀愀然念不風雨其除翦其蕪穢庸何能妥神  
靈以崇光禋祀未幾且奉

旨詔所在有司暨都人士稱力捐葺乃進多士而告之曰大夫之象  
修治其俎豆者其裔必昌童蒙之子洒掃其家塾者其人必慧十夫  
之聚農功既畢歲時伏臘以葺其所常祀吁嗟澤宮乎實何地詩曰

思樂泮水寧惟是折摧叢傳者可樂耶亦思焉而已矣予請以薄俸  
先汝多士其識繼焉然既誠於中而亦弗恤其繼之何若卜吉日興  
畚挿鳩工取材初不泥矣舊制煌煌乎翼翼乎瞻有恪焉復進多士  
而告之曰今者擇宮告竣祀事修明止矣乎未也顧名者貴思義夫聖  
人之廟即天王天王作素王明堂坐明堂而布政宣猷端非漫易天地之經  
生民之命君子守之而萬國安其常小人放焉而一身不敢自附於  
人政化在此敦行崇道居佩禮樂而出奉典型誠繹論語一編上下  
萬言何一非納民於軌物之中即以聖人天生使獨猶自朝乾夕惕  
孜孜不遑其曰君子有三畏君子有三戒君子之道四其未能一其  
慎懼謙抑較加於下士者多矣居四民之首家習往聖之訓已為遵



道得路乃俄而偃規矩改錯焉背繩墨追曲焉競周容為度焉競竟與閭巷庸愚寄命司牧者同母乃為聖人之僂民黯然幽獨對衾影且深赧恧吁嗟澤宮乎實何地而敢旅進旅退於其間乎爾多士不乏紛內美者乃今而後砥礪行標慄慄然尊所見聞登斯堂也考鐘代鼓悉茂行矯節菁莪棫樸之選為周之楨周之幹乎予為陸陽慶予為上國慶也多士識之豈雍正三年己巳

修啟聖祠記

謝錫侯

粵稽祭川者先河後海海者川之宗也祭川而及海亦不忘本之意也夫玉書吐聖人誕雖曰天地之孕毓秘極而洩蓄極而流疇非祖宗之積累所致哉此尊聖者尊其所自出尚矣即如宋封公元封王迄有明則通建祠於學校煌煌乎俎豆歷百年而恒新今且較前代而倍隆王爵之錫榮及五世嗟乎冒行神明令人追維前烈嘆篤生聖人者之聖德為不可及也予忝為陸陽令差幸

聖廟功甫告竣猶惴惴焉懼無以妥聖人先爰是鳩工庀材構五楹於殿後配壇從祀壇各稱其位雖不敢云輪然煥英焉亦既煥然維新矣繼自今瞻拜之下恍見聖人之子孫父子相聚一堂陸陽乎柳關里也

新建先農壇記

傳曰有能播五谷則祀之又曰粒我蒸民寔嘉賴之夫國以民為本民以食為先無食則無民無民則無國農事亦綦重矣哉予嘗以公



出閭巷竊見負耒荷鋤之輩祈求報賽遑遑以時謂我黍稷惟神是依非此莫庸也今

聖天子眷念群黎知稼穡之艱難特詔天下郡縣建立先農壇壇前開藉田數<sup>畝</sup>經制典禮備極周謹予敬奉命敢不殷然為主伯亞旅倡嗟乎服先疇者不忘舊德第進農人而勗之曰毋滋蔓草致害嘉禾或作或息各惟其時倘怠荒乃事南畝就荒爾婦子其何以堪雍正四年歲在丙午仲春

### 新建忠孝祠記

先民有言曰讀出師表而不下淚者其人必不忠讀陳情表而不下淚者其人必不孝在兩公當年不過以尺寸紙寫自己情私遂令後代讀者洒無窮之淚又何自知其所以然噫善夫纏綿篤悱之忱匪石匪席者已久矢諸寤寐值其時勢而登發為辭說怨慕泣訴雖極孺子之哀音而終不覺後之讀者淚自聲出亦不自知其所以然予謂仍是當年之人之淚特洒未盡今日適借我以盡傾之耳非我之別有淚也今

天子念切忠孝詔各郡邑創祀時其祀典知往古來今海隅山陬槩不乏人未容泯泯也先民謂讀出師表陳情表而不下淚特借以驗人心耳若夫無忠臣無孝子天地亦無感之風雷郊廟亦無可敬之醉飽第淚也乎哉予陸陽守令也祇承

殊命以崇先陸陽忠孝復為數詞侑諸先生几席焉詞曰美人兮璇



11  
宮秋蘭佩兮裳裳芙蓉雲笈七籤兮芳藉其中雖數化兮大息特賚  
予兮渥隆築室兮建廡門兮宣慕容與兮無垠撫時採芳兮成禮冀靈  
之式來兮如雲

新建節烈祠記

節烈忠之比也從容就義者忠慷慨赴難者忠第忠不分名而節烈  
分也夫婦以夫為天鹿車共挽鬢毛對落幸矣脫罹於難焉維時聲  
咽窮猿血染杜鵑得同覆土本固甘之甚其獲不足塞責如堂上全  
顏懷宇中且穉又計續其裡祀而謀續之於他所生寸腸九迴萬不獲  
已乃忍寸息強起而稱未亡人慄慄柏舟風雨淒其若畢其世悉坐  
重雪之夜矣企彼美兮是何異於忠之從容就義者至若手有劍而  
口有血決從一無二之義或出其夫於顛危以身相殉或起其夫於  
沉疴以肌為藥紅顏草茵螻首邱山共姜多苦節乎與之共千秋者  
也其起視忠之慷慨赴難者又何多讓焉嗚呼嗟哉巾幗女子耳而  
冰心俠骨志氣浩然彼讀聖賢書侈談綱常名教食人之食而不事  
人之事樂人之樂而不憂人之憂頑頓集垢是所稱鄙夫是所稱妾  
婦也悲夫

節烈卜氏墓記

去城南里許曰萬丈坡節烈卜氏之墓宅焉竹樹叢侵樵牧踐踏  
墓傾為坪而將忘其址孝廉龐居驤重公事造宰室而告以所乃墓  
工斬伐實土而封其壟鑄石以表之事竣晨往拜墓下且與居民約



據五十步而樵牧者罰無赦明日龐君進而謝曰卜孺人貞骨芳魂  
 幾與芳烟草蔓草同其湮今君以碑以封墓用歸然盍勒一石以誌  
 諸後乎予曰世之居顯要擅威福趾高氣揚輒自計為鬚眉男子衣  
 冠丈夫一旦臨大難決大疑利害橫胸是非違心呢呢喁喁宛若妾  
 婦嗟乎衣冠鬚眉中豈少巾幗哉聞卜氏之慷慨罵賊捐軀全節則  
 亦可愧矣若其墓之滅而復存君悉告我君之惠也後之蒞斯土者  
 護而理之則一杯千秋非惟卜氏受賜已

節烈卜孺人墓記

龐 驥

予昔者從先王父過萬丈坡指示予曰此卜烈婦墓也原即瓊海人  
 邑侯張諱子翼之妻賦性剛烈持守嚴謹適侯理閩事流寇犯城孺  
 人率哨兵鄉兵守禦冀援不至城陷賊擁入衙署孺人登樓罵賊賊  
 逼之墜樓而死及張侯省旋哀悼備至暫葬孺人於此不封不樹為  
 後日改扞計詎料侯旋里不復來陸而孺人遂長埋焉小子誌之因  
 兵燹後牛羊雜踏右塋決崩石墻且半露荒殘烟草矣余目擊心傷  
 者久之適謝使君抵任訪忠孝遺芳採節義潛德予亟以告使君為  
 之咨嗟嘆息輒鳩工修理去榛蕪厚其封土勒石以誌之備物以祀  
 之又為之申採樵之禁嚴畜牧之擾嗟乎使孺人無墓而有墓行道  
 之人咸知其為卜烈婦者矣謝使君之澤及也予得徵公之所以宅  
 衷矣衷



伏波廟記

謝錫侯

治出東南逕一水而浚沙石稜稜疊起側峙居蠻馬伏波之廟踞焉  
 新令者至例有祭予為有漢名臣祭之固所乃齋宿往拜守下孝廉  
 李君惠宗淳家其近址聞子至來相道歎且携以遊曼日流觀若波  
 濤之汎溢如草木之紛披魚歌樵笛遠近相答岫雲谷靄奇幼盈眸  
 俯仰上下之間恍乎蛟龍文章條忽焉不禁臨風自息矣李君請以  
 故予曰新息與諸葛武侯其勲業非隱伏弗昭而又紛有逕庭者今  
 宰執請增祀武侯於學

天子詔曰可而竟未議及新息豈古人之遇合亦有幸不幸耶他日  
 得趨對大廷敷奏乃公後謹以此為請庶幾乎遂予志之所感李君  
 是之

圓通菴碑記

謝錫侯

白石甲之圓通菴維代孔綿萬歷間有江西吉安黃姓者舍身奉佛  
 并其腴田若干齊入作蘭膏供吳逆之變土人以亂易亂剝佛而金  
 償酒錢所謂蘭膏供已甘而啖之賴盧秀才某起而禮理其事於霍令  
 得返汶陽未幾復囊之而去里民公鳴於邑令而壁仍歸趙未幾又  
 被強而有力者視為固有幾十年嗟乎出入方便門中迭為座上嘉  
 賓厥田亦可謂得圓通法者甲辰秋孝廉龐驤以及一素招古潭上  
 人回錫聖武專主戒壇繼白石甲黃彩華等覩圓通墻圯椽爛坭土  
 佛不能救落水羅漢乃聯名請上人為維那以修以葺神樓攸芋前



來乞言勒石予何言哉第告之曰取非其有非禮非義是不待教而誅此明條也我不拈一粒未低三回頭而猶染指菩薩當前頂門吃大黑棒時方急急念阿彌陀佛晚夫數語落上人意如上人願焉至捐助之多寡暨諸名氏請特書直書行右以昭當年慷慨好善者

### 六冷祠記

六冷溪名也羅侯何人而祠以六冷名豈非以是溪屬之侯哉溪之流不遠其流屈曲而清溪之上則羅侯祠焉諸鄉人之遠溪而居者咸神而祀之故棟宇之傾者理舊者新迄今入羅侯之祠而見廟貌巍然東山列其左鳴石峙其右瀑布掛其前溪聲潺潺與鐘聲相響答噫侯之德所致與柳侯之靈使然與詢諸故老曰予生也晚侯之名亦相與忘之然聞之前人曰侯之生甚異人有禍福言之輒應至今鄉人之祀之者歲時祈禱亦若是焉已矣予曰侯之靈既聞命矣而稱之以侯者何也曰噫予不聞之謚法乎有請於朝者有議於私者我今鄉人之尊而侯之其亦私謚之意云爾予何疑焉然則祠何獨建於斯曰侯居於是極愛是溪之清流故建之而即以名其祠余曰唯唯為之記羅侯祠

羅侯姓名無考縣東七里六冷也有仙術能以禍福曉人後尸解於六冷溪上數日顏色不變鄉人異之立祠以祀禱輒應禮曰能捍災禦患則祀之里社之間歲時祈報雖不飲於有司亦經祠非淫祠也鬱林陳科鑣附書



重修縣學記

先師孔子道冠古今德參天地樹百王之模楷立萬世之師範春秋  
 俎豆典禮加隆文廟祭器並入交代蒞斯土者自當敬謹保護以副  
 聖天子崇儒重道之雅化方為無忝厥職陸陽雖屬輒邑而翩翩仕  
 路指不勝屈霞起雲蒸更僕難數宜乎膠庠丕煥棟宇常新矣顧自  
 十餘年來縣令一官非遠掛彈章即權時代庖曾未久於其任致學  
 宮修葺無聞傾頽日甚明倫堂宇坍塌無存兩廡鞠為茂草歷任因  
 循已非一日己未冬余奉 憲委攝篆是邦釋奠之餘覩茲殘廢蒿日  
 興嗟思欲重修而力綿不逮爰揖縉紳李登封守謀以眾擊之策  
 順風一唱而觀察龐公首捐重資其鄉宦先生以及後起之後亦莫

不欣然樂從多助寡助共計約四百餘金簿書鞅掌監督為難復於  
 諸生中擇公平者董率其事鳩工庀材於庚申之夏興工是歲臘月  
 告竣宮牆殿宇大為可觀從此彼都人士愈知 聖人之可尊儒術  
 之足重趨向端而心志一德業盛而人材興予固於此有厚期者矣  
 因序其梗槩而為之記時乾隆五年庚申季冬



重修陸川縣學宮記

孔廣平

陸川為古繡州地山川明秀風氣清淑其君子溫文而有禮其小人淳龐而畏義是雖由沐浴於聖朝加意學校之恩者深亦從前賢邑宰能惠先務使之然也余忝至聖裔歲丙午來令茲邑謁廟後徘徊瞻顧見夫椽桷垣墉漸就傾圯即慨然有重修志未敢遽作以勞民也迺視篆未幾旋調署興業縣事興之學猶陸也爰以不得為於陸也而舉新之於興獨愧余蒞興三載短於教化不能彷彿治蜀之文翁還念陸人士氣節文章素稱鬱<sub>乃</sub>即巨擘人不獲新其黌宇以妥先聖而召後學心竊懣焉而不圖旋陸之日仰瞻廟貌已煥然俱新矣問誰實倡之僉曰前任漢嘉楊公其能急先務者乎而或者

謂吾夫子宮牆固歷萬世而不毀者區區修建亦分內事耳何足為楊公重<sub>柳</sub>知修宮室與修其身事不同而術相似也人<sub>吾</sub>去聖人遠矣其可造於聖域而恃此修焉而已昔明道先生有言曰治天下以正風俗得人才為本彼學政之不修師道之難立後生無可興起無以成就之方由是思之修者治也治而去之之謂也自茲以往誠能因而山水導焉濟焉乘而風氣安焉遷焉去其不如聖人勉其如聖人者將見達而兼善世道賴以不墜即窮而隱居亦足以淑世而範俗則楊公此修不重有裨乎是舉也經始於己酉九日落成於庚戌六月僉謂記宜屬余為至聖裔且先有志於重修也余既樂觀厥成因推公所欲言以應邑



士君子之請公諱書最西川巨族以丁酉舉人署陸篆稱賢邑學  
博臨林朱居阮藤縣蘇君秉晁曲史江蘇吳縣章君來泰皆贊襄文教  
而邑紳之董役勤敏又以丙午科舉人揀選知縣陳君學海府經歷  
職呂君象履武生龔君以剛為之最供例得並書乾隆五十六年歲  
次辛亥

陸川縣學加額記

孔廣平

陸為學考西小邑故選弟子員僅八人而文風甲於一郡操鑑者每嘆  
設額之隘而無如之何歲壬子學使者吳江費公力請於朝減西林  
凌雲額學四名而增為十二由是陸人士歡欣鼓舞以為余慶且曰  
邑學之仰荷加額也雖 朝廷之盛學典使之厚惠令長之德化抑亦

至聖之神靈實式憑以至致之也先時己酉署縣事漢嘉楊公重修  
聖廟邑之捐資襄事者指不勝屈今日之盛實於此肇其基焉蓋誌  
志之以為後來勸乎余曰 聖天子作養人才之至意學使者量材  
裒益之深心於邑宰何與雖然盛朝渥典之頒適當文廟告成之後  
其所由來或即如云云未可知也且夫天之生物因材而篤栽培傾  
覆於天無與也大聖人參贊化育過化存神雖無一人不被其澤而  
實難為自棄者強予以所不欲是故禍福咸自己求成敗惟人自取  
今陸人士奉 至聖為依歸大而綱紀倫常小而日用飲食惟 聖  
教之是依故即程以聖靈妥侑之區棟宇或有未完垣墉或有未飭  
莫不約之椽之輪焉與焉欲一聽諸風雨飄搖而不得無或乎人文



日盛遂致 渥典之加前人之愛莫能助今之人乃不期而自至也  
 然則學使者之加意於陸因可加而加之非必加意於陸也 聖天  
 子之增廣於陸因可增而增之非必增廣於陸也今無文翁治蜀之  
 能幸獲躬逢其盛而陸人士且謬以為令長德化之所致也余則滋  
 愧矣即楊公之重新黌宇丕振文風亦因陸人士之蒸蒸日上進而勸  
 之俾勿壞以迎機而利導之豈必獨加意於陸乎哉然 盛朝渥典  
 之頒適當重修 聖廟之後如所云云誰曰不宜繼自今誠能循而  
 不倦將見畜道德能文章之士接踵以出則科甲之盛正未可量詎學  
 額之加而已乎陸人士曰然請誌之以為未來勸

新建三峯書院記

提督學院 許道基

書院之設以佐學宮肇自宋元建置半天下郡邑生徒萃焉進德修  
 業親師樂道羣以專以積以小成大成育才之效迨古黨庠術序遺  
 意則務之當先也陸川粵西小邑而俗稱淳士彬彬禮教近文接踵  
 舉科第漬 聖化久且日上顧未有書院先是邑之人士屢謀經始  
 以莫適為主事不集乾隆乙亥冬石居崇先攝邑篆不三月政闕教  
 養激勸者次第舉而創立書院其一也明年二月余接鬱林君率其  
 人士以院之未有昉也乞署名且記所由昉余聞而嘆曰粵士之需  
 教也亟矣而郡邑博士之不克徧教也審矣予始至蘄邑必在塾求  
 師以勞來後學交修博士之不逮顧願力不齊徒抱以默也而君遽



能之乎又仰而思曰志稱三名山在南一里峯列如三台向學宮並  
 人文之主山也院近聖人居而化成人文實學之支蓋即以三峯名  
 之於是陸之士聞其名也而喜予進而詔之曰爾知名三峯之意乎  
 元功運行彌綸塊北若窪若突不知而然惟山岬列崩礪砢青碧空  
 嵌得天地正骨秀氣峯之於山尤其巔者也隱隣下臨峻嶒上挿芒  
 射星精位崇五雲峯之自為名哉骨氣使然天不能不凝地不能不  
 伏固以藉靈巍峯立景穎水吸精導脉生我人文豈不欲以峯之三  
 台為貴者相乎不求其骨氣而已矣骨氣生而有之則正且秀亦賅  
 而備之而第技之勿傾以邪擢之勿蒙以穢正者峙秀者出標格所  
 樹天自凝人伏聳然而獨實是亦人之三台己人有圭爵峩峩金紫  
 赫煊而時過名設不克卓立千古無化骨廢而氣消也惟立德立功  
 立言之不朽比諸山峯之不騫不崩蓋積厚者峻極有主者常貞故  
 曰居仁由義大人之事備矣士登斯堂面斯舉顧名而思義砥節而  
 磨光亭亭乎獨立之姿高高乎不可掩抑之槩則峯之精神攬而收  
 之方寸矣粵山靈奇甲寰宇大容起伏尋鬱梧三郡在陸則有鳴石  
 謝仙文龍鳳凰石湖金坑諸山他有名者尚不勝指其清淑磅礴皆  
 可作三台觀也詩不云乎高山仰止志嚮往也魯頌思樂泮水而繼  
 之詹泰山孔子登而以小天下士時作三峯想則可以小陸而陸藉  
 以不小矣石居西蜀名孝廉官秦中十年所至拳拳育士今之來豈  
 其事之遷效之不可必而亟之先務者居家徂徠先王勇於任道以



經術教授南京在大學弟子益眾大學之興自此始士以魯之尊俎  
 侏者尊焉君能薪傳符合一以教大學者教陸是未嘗小陸而陸之  
 士可自小乎余既署陸之名山而大期之復告以學山之實為正骨  
 秀氣而非徒轉魁傲雲外暴之是求若夫扶正惟志志立骨動擢秀  
 惟學學沉氣華志在希古學在窮經不然無從入也多士識之而已  
 於是陸之士聞其所以詳也而益富乃文諸石以驗其效焉

新建三峯書院記

石崇先

記曰君子如欲化民成俗其必由學乎是以古之教自州閭以達王  
 國無不立學之地自國子至於庶民無不與學之人自春秋冬夏以  
 至三年九年無可去學之日教士之法依古為昭我國家作養人才  
 振興鼓勵各省會建設書院為多士廣誦讀之地慎師儒之選而淬  
 厲之何莫非古者所立學之遺意與歲在乙亥余攝陸篆覩其衣冠  
 文物彬彬然禮教邦也其學宮崇聖祠明倫堂凡有關於學校者悉  
 輝煌整肅獨書院缺焉紳士等呈請於城南萬丈坡創建僉云籌之既  
 久未興舉耳余曰此盛事其亟圖諸爰集紳士履其地相度基址建  
 講堂一進藏書閣一進門樓一進各三門兩廊書舍各十二間詳之



上憲批允舉行通學憲按臨科試諸生稟請賜記題額額曰三峯書院記又取三台山對峙之祥為多士勗猗歟威哉都人士藏修遊息砥節勵行日漬夫禮樂詩書之教以馴至於小成大成之效蛟騰鳳起霞蔚雲蒸俾鍾其祥者無負於其祥且不僅於陸邑之祥而直可謂國家之祥以仰答 盛朝樂育之盛典克副上憲期望之深心余所厚望焉是舉也經始於乾隆二十一年三月落成於十月費銀六百有奇所有捐資姓氏并設書院修脯士席糧田勒石以垂不朽

重修卜氏夫人墓記

石崇先

城南三里許萬丈坡貞烈卜夫人墓在焉溯其所自廣東瓊海人明嘉靖邑令張諱子翼正配偕隨任歲辛酉張赴省分校適流寇犯城夫人率民兵拒守援絕城陷賊逼衙夫人登樓北面再拜墜樓而死越三日土人覓得其屍顏色如生藁葬於萬丈坡不封不樹尋張侯以事去不返貞骸烈骨遂永瘞於荒郊杯土厯百餘年幾無有過而而問者追我朝 雍正三年前令謝諱錫侯始築墓鐫石作文以記載之省志有土梗陳光居與墓鄰侵其地署令陳諱君觀世暴其罪擬發配令去侵踞如故乙亥冬余攝陸邑篆親往謁墓重申五十步某築垣以界建亭設祀維時偕紳士李宏培呂颺綉陳宏詔龐琛等洗滌舊碑宇迹忽見石紋松竹儼如圖畫詢貞烈之氣盤結發洩之奇爰徵各名詩勒之貞珉以誌不磨乾隆二十一年丙午年



## 圓通菴記

石崇先

縣東北二十里白石甲有菴名圓通者明萬曆間江右吉安人蔡  
 所創也蔡慕清淨法披幽雅入空門并其腴田租七十石載米二石  
 一斗七升為蘭膏供自兵燹之後蚕食屢矣甲民三控而趙璧三復  
 乙亥冬余攝篆是邑邑之人士以陸之未有書院也謀於予予不敏  
 勉襄其事丙子夏有自稱亥癸後者具詞懇折撥民米六斗三升租二  
 十石助書院膏火費甲民是之而獨以非癸裔斥噫癸之子孫有無  
 何必深考而襄美舉之意誠善也予嘉其意允眾請其餘則仍歸之  
 菴復據甲民具呈求予為文勒石以垂久遠予何言哉夫人情有利  
 則趨財產無主則散以梵刹之業歷數百年之遠斷碑殘碣考稽非  
 易宜鄉曲小民垂涎者眾將聽其散而無統是佛之醮會無資也癸  
 之邱墓無主僧之膳膳無出菴之傾圮無補也今與甲民盧泗矣并  
 亥琰等約經之理之扶持保護毋致侵漁耗散也可若夫思染指肥  
 私囊匪惟神不可欺且有煌煌之國法在是為序

## 重建修竹菴記

石崇先

陸川僻處偏隅蕞爾區也然其山川秀麗恒多名勝足供遊覽余攝  
 篆茲土一切興利除弊思所以攝其人民為先無暇謝公履尋山問  
 水也閱陸志有所謂修竹菴者邑名勝溪水清流石峯壁立其梵宇  
 之幽靜足以洗濯塵襟而摩雲閣又可以憑高遠眺不禁心嚮往  
 之省視西疇之際或得一寓目乎適近寺居民以重修菴請謂東山



之麓向有小菴顧曰修竹前明陸一清修道其中施撥田米一石五斗八升後生員黎瀛亦施糧米一斗為常住費未幾燬於兵廟宇將頽摩雲閣亦廢所施田畝里戶侵漁其半康熙四十九年邑貢生陳之瑜惻然動念問於前任復還舊業重修廟貌將田米交住持管理後侵漁復然前任謝尹特為立碑詳記第僧多浮蕩未半年浪費一空不能統理定踵前徹爰於乾隆十六年呈於縣公准貢生陳宏紹理鳩工庀材為重修計求記以垂久遠云余竊惟寺之興廢固藉乎田而尤藉乎人昔海內天童寺有莊三十六所田一萬三千餘畝寺田之廣無以過之其後斥廢殆盡况修竹僅田若干畝乎今廟貌修復廢興墜舉莊嚴畢備修竹重開生面矣古人不惜貢金圍八十頃余何靳一記爰書其始末詳載於碑

重修陸川縣儒學記

邑令 應斯鳴

陸川縣學自前明嘉靖知縣張子翼遷建城北清朝順治十六年知縣周士選重建之嗣後修葺者再乾隆戊寅臘月正殿傾圮前任張章以丁憂離任未及營構己卯夏四月斯鳴來宰斯邦南下車恪恭謁廟見正殿無存兩廡朽蠹將傾周遭四顧凡椽桷牆垣多損壞剝落心甚恚焉遂與教諭羅溪訓導姚景温典史蔣邦瑜等相商曰興學校崇教化為政者首務也吾輩當捐廉俸以為紳士倡僉曰然越數日闔邑紳士會聚明倫堂踴躍捐資效力共圖創修公舉貢生陳宏紹舉人李宏壩武舉呂颺繡貢生龐峴監生陳名佐等經營規



畫庀材鳩工與典史蔣邦瑜董督是役也和衷協辦朝夕勤勞饕餮皆各自備毫不支給公項於是財用有資督理有託不待勸勉而事克集諏吉於六月十八日興工先建正殿培土增高共計五楹次建兩廡各五楹其啟聖祠明倫堂名宦鄉賢祠及戟門禮門義路門凡倒塌之處皆次第完葺泮池圍橋浚深新砌櫺星門添高聳立階墀圍牆修造堅密門外鼎建下馬碑以至神龕木主几案匾額俱革舊而更新之既而棟宇巍峩內外鞏固黝堊丹漆潤色輝煌視昔日規模更覺美備乃卜仲冬之八日率官僚紳士恭奉先聖神主陞座行釋奠之儀趨蹌對越肅然如臨其上祀典聿修以妥以侑庶足上副聖天子尊師重道之意廣宣棫樸菁莪之化矣今庚辰二月工告竣計費白金六百有奇其助貲姓氏另鐫諸石予樂觀厥成爰記創修始末額手稱慶曰學宮者起化之基端士習振文風善民俗莫不植根乎此陸川素號多才科名仕蹟後先炳蔚為鬱林四屬之望繼自今尚觀感奮發研究經義勿徒記章句務求躬修實踐篤五倫敬五事備五常正心養性存誠戒欺雖聖賢堂奧可循階而升也由是明體達用鄉閭效其模範民物被其恩膏朝廷資其輔弼立德立言立功皆吾儒分內事地無論邊腹也人無論古今也願力行何如耳願與多士共勗諸



新建萬壽宮闕帝殿合記

應斯鳴

予蒞陸川之明年庚辰春正月邑之紳士耆民躋公堂慶賀以次謁見予詢謀於眾曰春秋祀典文武兩廟並重茲文廟建矣而武廟推類何以見行拜跪獻裸之禮乎且今歲皇上五旬萬壽何以為臣民慶祝之所乎盍亟圖之眾欣然相告曰比年以來風雨順穀粟豐民物寧上荷聖德之懋懽默召神靈之庇佑頌祝崇報萬姓同心顧未有宮殿以來輿情予乃先捐廉俸十九堡士民踴躍助銀而典史蔣邦瑜毅然不辭勞瘁匡襄督理始終仔肩爰度地於縣始之右舊廟東向一樣湫溢木腐墻崩悉掣去之遂新闢基址卜定南向爰四月大興畚鍤工匠雲集凡木石磚瓦採擇悉皆精堅秋七月棟樑椽桷具備分布上座前座三間上建樓台為慶賀結彩之區其下為殿門為班房中座五楹為大殿崇奉闕聖新型神像左右翼以長廊朔望宣講聖諭僚屬各就厥位上座三間為萬壽宮正中安奉龍亭遇慶賀大典文武官虔集丹墀跪叩行禮東西朝房各二分列值宿初班周圍垣墉環繞結構極壯麗恢宏仲秋之吉恭祝闕聖於新殿堂廡肅穆階墀廣寬登降陳設內外誠恪禮儀大備八月十三日欣逢萬聖壽節先期示諭遠近紳士濟濟咸集隨眾官詣宮前叩賀四方來觀者闐街盈門莫不魚貫而入稽首歡忻共呼萬歲連日鼓樂筵宴謳歌遍滿遐陬予於此益徵聖化之洋溢神靈之感乎而人心之易於從善也陸川屬粵西邊



徼至京八千六百里之遙凡大慶大祀之典非耳目所習見稔聞者  
 乃邑宰首倡士民羣然響應爭先捐貲不數月而宮殿鼎創豈以務  
 名哉良田漸摩於德澤感激於忠貞處荒裔之遠如覲天顏咫尺生  
 百世之後仰慕漢代蓋臣具愛戴欽崇之心動乎天性不覺勃然自  
 生翕然大同推此心以行已接物則教不肅而成政不嚴而治彬彬  
 乎禮義之邦矣斯舉也酬君恩勵臣節妥神靈一興作而三善備焉  
 至於踵事增華保護修葺更賴後來者之各盡其道各盡其心耳無  
 庸乎囑

伏波灘右新建文昌閣記

孔廣平

觀乎天文以察時變觀乎人文以化成天下合天人以言文其為文  
 也夫必有司之者矣是故神道設教聖王重焉天垂象而傳說為列  
 星理固有之不容誣矣文昌實北斗之一星歷代臚於祀典玉衡照  
 耀文教用彰賢才感而儒學振興隆臨下民惟神是賴道家所記又  
 言神降生於人間則為人詩稱孝友燕喜即化其身為之士子科名  
 實掌其籍斯言信否未可知然而孝弟之至通於神明固人也而以  
 神事之疇曰不宜陸川為粵西偏隅其為士者能文章砥礪廉隅農  
 民勤於稼穡簡其秀良亦與為善縣治南三峯聳峙曰三台山乾隆  
 丙子始建書院於陽構高閣以祀文昌用昌文教而他所未之有也



伏波江發源縣北分水縣東文龍諸石合諸水以達濂江而入於海  
水勢湍悍清流至難面墟西南有灘廟祀伏波將軍於其麓山石根  
角橫亘水中水至此為石所阨怒奔突若驥騎之奪重關以出沛  
然一放乃少休兩崖之間沙平而土曠為形家言者謂由此而下水  
且渙矣渙者必陰有以翕之而後其氣聚享於帝立廟先王所以萃  
渙也其地爽塏則於建閣也宜閣高明則於祀文昌也宜邑中諸居  
子是其言協謀量力庀材鳩工經始自丙辰之秋越明年三月而閣  
成奉文昌形像於其上春秋秩祀俎豆用修余惟壓勝之說儒者勿  
道禱嗣求福亦矯誣者之所為斯閣之建固將使學者仰而望知祿  
命之攸司存乎天反而求知性天之垂教存乎人敦孝友以培其根  
念典學以竢其實夫人雖殊其理一也知其說也夫且合一邑之士  
習民風駸駸日上本立而道生固不特迴狂瀾於既倒矣鎮壓形勢  
也乎哉廣平官遊於此先後歷七年餘教澤不施今嘉諸君子坊民  
事神崇尚斯文之至意而幸得瞻拜於閣下因其以碑記為請而書  
所見以遺之俾刻諸石時嘉慶二年歲次丁巳



## 孝子黎伯寬傳

公諱伯寬字仲容號方塘其先江西人也家陸川父諱聰陸川歲薦公秉姿敏穎讀書過目成誦母早喪事父每食必待每出必告每反必面昏定晨省歷十餘載率以為常父或遘疾則憂形於色衣不解帶湯藥必親嘗迨至沉疴雖憂苦猶強慰父曰無虞竊自呼天號泣求以身代嘗糞甜苦以卜瘥劇有古黜婁風君子以為難焉泊乎父終執喪哀毀骨立逾月卜宅兆而安居之築室墓前不問家人產業朝夕進膳如事生儀時扳樹號呼涕淚著樹樹為之枯牧童樵豎聞之感動歌曰黎孝子黎孝子見親無有期思親何日已其至性動人如此雖禫祥歸家猶餘哀未忘遠近嘖嘖嘆羨弗衰昔人云求忠臣於孝子之門公由明經官浙江西安主簿歷南甯吳江縣二尹所至有政聲使公職司大僚當與古人名臣爭烈矣而竟以縣丞終可慨也夫雖然古來之膺高爵厚祿赫赫一時者曷可勝數而名卒湮沒不傳請以視公其優劣何如耶大夫子六長可耕登賢書知安順州次可耘以恩貢歷安定縣戶三先卒四可耜由明經任寶慶府教授五可耨以鄉薦知漢陽縣六可耨以選拔任潯洲府教授公可謂有子矣人以為孝廉所致云



孝子龐希睿傳

公諱希睿字士哲號月川生而仁孝稍長出就外傳放學歸依依膝下復館遲師責之曰子非逃學者乎曰學以何者為重師曰以科名為重曰抑末也所重者孝耳某事親不暇非逃學也識者奇之既而身列黌宮每行一事必告其父母曰某今日所行某事每交一人必告其父母曰某今日所交某人惓惓然必求其父母喜悅而後即安一日者母疾急倉皇失色求醫藥行不成步幾乎墜於來清橋下日夜侍側衣不解帶母不食己亦不食疾止乃復初俄而遭父喪水漿不入口淚盡繼之以血居廬守喪三年足不入內室口不茹葷腥止需一老僕侍茶服閱檢其寢苦如糞粉生平不治生產家世清白薄

田無幾一任季弟分予縣令嘉之贈以牛判百紙蓋一紙可得銀五錢歸告母曰殺百牛之命以資朝夕可乎悉焚之有捕兵奉上解屯田餉銀凡數十兩酒醉失落公拾於道上晚歸不抵家爰宿聚奎峯書房次早寫拾帖於城北南門兵來識認還之酬以一半公曰豈受謝者速持去兵感激無地領歲薦無心仕進嘗賦詩有云老淚兩行惟母在餘生一日即家居著有周易精義儀禮雜解並選錄古詩文約二千卷明季兵燹散失父鼎萬歷辛卯科解元子二長鳳裔邑庠生清朝勅封文林郎次鳳歷



## 龐運使傳

廣西學使許道基

龐運使諱嶼字石洲號曰頗亭先世自化州徙居陸川祖穎父驤並鄉薦穎為嘉魚令值夏包子亂力保孤城楚粵兩祀之嶼沉毅有大志才思俊逸為諸生已負盛名雍正丙午以選貢鄉試第二人丁未試禮部下第會粵東請吏即承命以往陸川故鄉鄰粵東嶼周知風土而風裕牧民經濟先後權鎮平歸善二邑事廉能善決獄革歸善高船照費及屯糧溢羨民歌誦之遂見重上官調番禺令番禺會城劇邑嶼堅明約束不一月乃健戢輸納平治海茭沙二司何為盜藪出入剽掠為番舶大患盜魁李士雄多羽翼工偵探蹤跡橫官捕之十年懸千戶爵賞而卒不獲大吏持剿撫無成算制府孔毓珣顧謂嶼曰此不撲滅於成燎原雖然茭沙生靈可憫也嶼進曰公念生靈德莫大焉竊謂剿撫非有亦並用之耳誠假以千兵許便宜當扼要聲剿仍宣德意尅期聽瀚洗其孰不畏死幸生俯首就撫者李士雄雖黠羽翼既失擒之一夫力耳勦不已易何由滋蔓乎因出沿海屯札圖以獻制府審嶼能辦賊即命馬參將統兵千兵聽指揮嶼乘夜密布要害及晨茭沙人始知兵臨欲遁無路大驚聚泣嶼單車馳諭曰所不赦者李士雄一人餘許自新無恐然逾日中不從我者入剿吾不活爾須臾就撫數百人內有積案逋盜二百七十餘又縛送制府附請未減餘悉縱遣之獨士雄先期逸嶼復命曰盜魁雖逸然在掌握中耳乃召已撫者授意使為計旬日忽十餘輩昇一人至



則士雄也且曰士雄多結貧民恐謀奪救故詐為鬪鬪鳴官狀始得  
 達耳事聞擢廣州府理搖同知撫定八排猺加設汎陰隘攝韶州府  
 事添炮台兵杜海寇出沒撫數百人上海防圖題達報可香山諸境  
 以寧賊陳美綸曾合陰結粵東西無賴圖不軌嶼密遣弁至梧潯抵  
 五屯計擒之獲符劄印信時懼株連者衆案定刑止巨魁二人遷廉  
 州知府未行調廣州知府善折獄而不事刑威民有前後青天之頌  
 前謂吳隱之也雍正十二年進惠潮嘉兵備道五載連稔賑不待報  
 存活者無算乾隆六年海南大飢以嶼善存撫附遂移雷瓊道通輸  
 平衡石散蜂蟻經理四月食足境安遂遷兩廣都轉監運使司益運  
 使粵商貧而侈多浮耗逾糧則餉虧繼必追賠不已則商病嶼日籌

抑商通引首革餽遺陋規悉以漏計一十三萬金歸公一無私焉兩  
 視臬篆一攝糧儲皆以清嚴見稱既以益政宜視遠近難易行勾銷  
 之法議格不行遂用獲譴譏無實得請復原官嶼既積勞成疾乞  
 假歸里數年竟不起年五十八子琛瑋並能文琛登丙子賢書通敏  
 有父風嶼之攝糧儲也使所屬解役自執撫不溢粒米尤禁違例折  
 色未幾後官以折色事敗遷遣大臣往治追覈二十年積弊惟嶼一  
 塵無染天子稱其廉會嶼病甚未及召用云

論曰士大夫當官廉靜存心利物賢已莫大於濟變夫廉靜自守臨  
 事惟擾不知所為則一方之害隨之其奚稱守土余觀龐運使之祖  
 當夏逆構亂以區區嘉魚捍蔽全楚誓眾安民有古睢陽之烈運使



嗣之至不勞聲色而盤錯理其勦撫芟沙雖虞仲升之於朝歌何以  
加焉蓋以有用之學世其家而非沾沾一節之士也聖人稱尼言折  
獄又曰由也果於從政乎何有諒哉





藝文志二詩賦

龍化江故城懷古

邑歲貢 謝天植

故堞荒烟亂綠苔  
兩溪流澗城隈岸頭薄霧藏  
文豹谷口輕風盪劫灰  
碑石卧泉新牧地鷓鴣啼  
冷舊歌臺當年龍化歸何處  
芳迹而今安在哉

鳳凰山

山勢嵯峨逼上台  
五雲飛處鳳凰臺  
晴嵐影日苞文現  
寒雪投林玉翅開  
乍舞虞廷誰可象  
載鳴周德不重迴  
寧能勝地肖靈質  
千古威名起草萊

題鳴石

邑歲貢 李昌祚

山腰留巨石媧氏補天餘  
微叩元音發悠然悟大初

伏波祠

邑鄉薦 黎可耕

伏波祠控伏波灘  
尚有殘碑漢篆丹嶺右  
山河歸版籍交南父老見  
衣冠青葱樹色天涯路  
淡蕩烟光海外蠻  
千古功高在銅柱不妨惹  
改與人看

伏波祠懷古

邑署令 劉思誠

森森桐柏鎖寒烟  
漢將靈祠水石邊  
祠在灘上八桂風雲悲薏苡  
五溪淫霧墮飛鳶  
功標銅柱誠何愧  
名顯雲臺更可傳  
千載精魂應慰藉  
只今遺廟滿南天

任陸川謁伏波廟



烟鎖重巒石鎖灘將軍曾此駐征鞍靈祠特地栽松護斷碣何人剔  
薛看自古威名存漢宇至今禮樂復周官溪毛野菽年年薦好為黎  
元祝奠安

題卜夫人墓

邑舉人 謝開先

報夫惟一死節烈至今存黃土空銷骨青山不葬魂石留人識墓世  
遠草封整勒石為賢宰褒幽慰九原

吊卜夫人墓

邑令 謝錫侯

君不見夫萬丈荒烟蔓草裏<sub>裏</sub>氤氳氤氳悲風起此地下藏節烈身苔  
封石閉無人指我聞驚嘆涕如流憑吊徘徊去復止杯土重培標姓  
名後來口口從此始陸川香今飛雙鳧荏符竊發紛吳豕乘城守

禦率鄉兵棄置針奩執鞭弭援絕孤窮勢難支登樓墜樓貞自矢猶  
勝當年斷臂魂稜稜正氣垂彤史乃知宇宙殺身仁形體雖灰神不  
死大節獨留卜氏魂故愧為男子寧無恥

題貞烈卜夫人墓

海鹽舉人 許敏燉 思晦 記水會

口口相從官齋靜丰姿清絕奈一霎黃巾煽黨亦眉遣孽隻手揮戈  
斜日暗孤城旗隕罡風烈裂草青青染遍杜鵑紅坡前血塵難汚明  
如雪色難變堅如鉄天應留認取臣忠婦烈萬丈高原沉素影千秋  
信史標殘缺白雲深浩氣展虹霓故前碣

貞烈卜夫人墓題辭

萬丈坡高去天尺一縷寒光出坡脊訴天天泣回散作霞丹沈血碧



吁嗟妻道臣道同可憐婦烈臣死忠三年寒宦勞於役一日孤城代  
有終何處妖氛突封豕烽入重闈拔劍起登碑陣灑淚集遺民墜閣  
留骸待夫子瓊海茫茫渺故園耶憑螺髻駐魚軒靈旗奠颺千秋恨  
星落筆前五丈原

吊卜夫人墓

玉林世叔  
臨安人俞成

夫人矢志在城存烽火何當逼縣門陣裏旌旗朝變色樓頭風雨  
夜招魂夕陽荒草塚淒涼影古道殘碑斷續痕一死甚難名節重我  
來憑吊哭黃昏

題貞烈卜夫人墓

武清令沈守敬同叔

天生夫人女中豪氣節直挾雲霄高挽槍芒掃西南處樓前玉碎輕

鴻毛爾時荏符口方烈健掣鯨鯢寒嚼鉄孤城痛矢無援兵罵賊登  
陣刀舐血從此清風萬丈原傷心何處吊貞魂年年寒食澆黃土夜  
夜啼鵓泣墓門吁嗟乎夫人身死名不死巾幗鬚眉誰與比柴家娘  
子謝家女英聲鼎足垂青史

紀吊卜夫人貞烈

邑署令胡位鑄鼎元

珠顏玉骨擁暈輿倏警蠻烟入郡隅志薄虞兮徒齒創身甘伯也代  
持戈城崩猶著夫人號軍覆先捐娘子軀貞烈坤維留正氣好將巾  
幗愧孱夫

貞烈卜夫人墓

邑令吳以賢

萬丈尋幽仰烈風青青古墓翠連空貞心結就松筠秀俠氣蒸成草



木豐盡節鬚眉誇武績全忠巾幗羨戎功英魂百代標奇勝保障東  
西瑞澤濃

弔卜夫人墓

邑令石崇先

雲暗前坡澹夕陽寒凝枯塚烈秋霜兵鋒斂作山河骨血淚分颺草  
木香爾日守陴人盡哭千年立傳筆生光一杯黃土今何恨獨立城  
南古道旁

俠概崢嶸五嶺奇閨闈正氣感鬚眉高涼城上朝封號金谷樓頭  
客賦詩斷碣新添松竹影貞柯果是雪霜姿影蓬三尺埋餘恨劍指  
空懸夜雨時

卜夫人守城歌有序

大平寺前玉  
林州牧

高盤寶意

前明陸川令張子翼夫人卜氏值其外赴省邑中寇起倉猝卜氏親  
督鄉勇守禦經時食盡城陷以身殉難藁葬於萬丈坡蔓草殘碑芳  
蹟湮沒去冬西蜀石明府來攝邑符請於當軸慨然建祠而俎之盛  
舉也千里寓書徵書於僕遂賦此詹詹小言何足闡揚幽隱聊答明  
府慇懃而已

昔聞蘄王禦金師梁氏臨陣擊鼓聲又聞周師鎮寧武劉氏登垣率  
婦女兩娥氣概何堂堂誰與繼者垂芬芳妻佐其夫臣報主能將隻  
手扶綱常陸陽勝國遭兵燹蟻擁蜂屯知不免赴省難邀縣令歸守  
陴悉聽夫人遣黑雲四合城欲傾孤軍力盡無援兵受圍已失揚旗



勢投閣俄聞碎玉聲烈婦捐生羣賊去夫人錦繡隨朝露鬱鬱深深  
萬丈坡云是當年埋骨處忠驅義感起風雷一代朱顏事可哀蛾眉  
偉畧有如此肩蟒腰犀真愧哉賢侯弔古褒奇節代舞葩永無絕貞  
魂毅魄招不還杜涓鵲滴盡班班血

卜夫人守城歌有序

邑署令 劉思誠純夫

卜夫人為明季陸川令張君子翼之夫人也時張君赴省流寇圍城  
夫人率壯丁狼目百計禦之迨援絕食盡力不能支乃墜樓而死一  
時之守陴兵目亦無有降賊者豈非夫人之大義克明忠貞節烈有以  
感召之乎洵巾幗完人古今所僅見者余攝篆斯土仰厥徽芳爰葺  
其墓亭為長歌以紀之時乾隆二十六年

冰署危樓拔地起湘簾不捲東風裏合平賢宰坐焚香靜好琴聲助  
彼美三事勞人事遠征妖氛四野薄孤城指揮不藉將軍力擔守惟  
聞娘子兵賊勢披狂援不至折骸易子無携貳夫人此際篤忠貞義  
勇真能感異類潰固不見一人降曰狼曰獍死堂堂短兵須臾猶巷  
戰何啻當年破睢陽夫人勢迫上危樓極目烽烟接素秋遠望空悲  
天咫尺淚相枯背裂瞳雙眸兵戈洶湧聲漸高成仁取義豈鴻毛賊  
逞狂風一何猛罵賊嚙舌舌如刀墜樓一死重千鈞丹心碧血愧人  
臣鬚眉中憫空顏汗望風稽首安足論夫人此心猶未已恨不完城  
報天子臣忠婦烈一身兼遑計芳名播青史天留貞骨風塵後萬丈  
坡前秋復春蔓草荒烟斷碣石生氣化作古松筠我來憑弔溯遺踪



高低四面青芙蓉勝國河山餘片土千載一杯馬鬣封百尺城高雉  
堞新樓臺故址點青燐碑墓松蘿壘流千古月照樓頭節義人

卜夫人墓碑有松竹痕

劉思誠

天地陰森萬丈原追尋往事弔貞魂孤城誓守寒吹角高閣捐軀夜  
撒藩碧血當年心未盡殘碑今日志猶存松枝竹節如生氣不是尋  
常列蝕痕

題卜夫人墓

龐琛

流氓猖狂日夫人義薄雲孤城臨萬騎一節當三軍無地堪容妾有  
天可對君至今留碧血烈氣掃妖氛

題卜夫人墓

邑恩貢

李 崔宏瞻

紅巾四突角聲悠急難誰知握上籌夫婿既無憑寶駒妾身還有綠  
珠樓能將婦節成臣節不為身謀破賊謀若問當年貞烈事碑間松  
竹照清愁

題黎孝子伯寬廬墓

李秀芳 西成

戴履深恩未易還遙聞大孝一潛然居官兩度人間有廬墓三秋居  
獨傳哀入黃雲千日永淚浮青塚至今鮮誰知我亦傷心者羞向坟  
塋誦故篇

石湖晴雪

石湖

雨霽山開一望空石湖映日轉玲瓏不須六出奇花現一派河山水  
鑑中



鳴石聞天

層巒絕巘半西山鳴石風封日自閒屬報登高人莫擊一鳴都恐震寰間

東山飛瀑

高山遠水望依稀石壁寒流入翠微噴薄無殊霏玉屑奔騰却似白雲飛

靈泉應午

石竅玲瓏吐玉珠會同陽煦佐康衢何須萱萼徵奇信靈異知含造化樞

伏波灘聲

中流擊楫獨躊躇洶湧波濤吼碧虛鉦鼓鏗鏗來夜月猶疑漢將下蠻墟

勸農即事

沿溪一帶盡農家水有良苗陸有瓜菹舍編籬修竹補青山作障綠雲遮平疇翠疊千層浪原野聲聞兩部哇耕鑿原來忘帝力無勞携酒問桑麻



貞烈卜夫人墓碣賦有序

龐琛

邑侯石公下車之始延宿碩之儒召博雅之士訪山川之勝採忠孝之遺客有以卜夫人對者石公欣然偕謁瞻拜之餘隱見碑間宛然有文匪苔匪蘚燦如著色有竹二株龍種班剝湘淚瑩凝其端倉松偃蹇勢若天降參差披拂光來耀日石公嘆曰嗟呼夫人以婦節兼臣道貞烈之氣上貫日星物既應之天亦感焉命予為之賦予曰琛孤陋寡聞未足彰夫人之烈惟使君命不敢辭敬以得之傳聞者而捨陳之爰濡筆操觚再拜而為之賦曰

維瓊南之特峙實中華之奇甸接芳壺之靈長作神州之後殿繫地紀兮巨鰲之首支天維兮五福之巔祝融秉令朱明司天元氣輪因哲人生焉爰有邱海羽翼上國操禹書佐皇極批逆鱗敢陳力迴狂瀾於東倒挽白日之西匿志士壯氣王臣生氣何其盛也粵稽夫人實鍾其地際其時英姿雅度粉黛鬚眉巾幘不能抑其氣閨闔不能掩其奇惟茲淑作配於張偉哉張侯受命陸陽琴揚氏歡歌樂未央爾乃喜捧杖士之檄星聚術文之場嘆王事之賢勞乃馳驅而不遑尉佐逍遙於無事夫人雅鎮以禮防野無戒備歲觸櫓槍何期玉席之地變化戎馬之鄉羅紅巾兮猖狂馳白羽兮告急雷動風旋霞散霧翕常山成重圍合殺氣盈雉堞呼聲震繡閣夫人乃撤簾薄步前除踐文履曳錦襦聽墀聲之從容感霧縠之紆徐姬妾為從保護傳先驅竦鶴立而未安凝秋眸而踟躕覩萑符之蜂起胸成竹而神紓



虞孤城之不競懼虐及無辜倏然震怒忽然改容蛾眉倒豎俠氣橫  
空解環佩而衣甲冑離香閣而賦即戎攘皓臂以揮戈約纖腰而闕  
弓竦輕軀於馬上揚玉貌於軍中昂若騫鴻矯若游龍先士卒而登  
城決死戰以揚幟傭監鼓勇疲殘誓死揮淚奮呼拔刀砍地舉戈指  
賊虎兕喪氣風颯颯而霜凜聲轟轟而電駛群盜辟易莫敢仰視既  
而城薄力微為敵所窺揭竿之勢復熾羅雀之炊無資守衛雖嚴軍  
威靡靡五雉一兵十雉一矢汲者負尸饑者易子恨賀蘭之不援無  
南八之斷指若乃闔門不假象力城隍圯若山頽釀成破竹之勢迫  
同覆巢之危於是棄長兵接短刃摩肩巷戰瞋目衝陣漂血濺羅襪  
流矢集雲鬢力疲兮歸水署勢迫兮登危樓責育至此氣喪良平當  
之失籌指天啣天賊慷慨就義罵斷常山之舌怒裂睢陽之背寧甘  
鐵絃之獲猶恥開封之臂標名節兮壁完墜層雲兮玉碎乃楊業之  
公忠豈錄珠之私誓浩浩乎披髮而對帝后跣足而入星辰碧血飛  
雲閣貞骸表古今



## 榕江堡謝仙山

阮調元

定州居粵西南徼其間多奇峯峻嶺我陸地處最高諸峯羅列不可屈指數而謝仙障在邑城東尤高出羣山之上平地突兀而起壁立參天橫亘十數里春夏霧氣籠罩半在雲霄遙望若列屏閣黑森嚴如摩詰淡畫一幅韓文公登大華詩云祇有天在上更無山與齊於此障彷彿遇之考廣東類賦註此山乃謝真人得道之處因此名山夫山不在高有仙則名况其高不攀者乎予重時常偕友登山遊覽望之橫列三峯形如行空天馬西峯為馬尼較之眾山已覺聳立最高者為中峯到此眼界放開北而玉林南而高涼各屬山川景物悉在目前頂有石鼓擊之響若銅鐘其東峯土名馬頭上有石桌一左右有石橙恍似仙人對坐觀棋情形山頂中間蜿蜒數峯峯之北有石印一顆形如督撫關防下有小石撐住勢幾欲裂而數千年如故非仙靈阿護不至此其峯之南拓開嶺窩可容萬軍背北面南兩沙交互儼然天造地設別開境界一望平坦幽雅山頂儼如平原中有池塘一口相傳為仙人塘塘面有二井泉止湧出雖冬春水涸其泉之流混混不少減也其餘絕崖巖洞怪石奇形路徑崎嶇人跡罕到雖以悉數咸豐間賊風四起環山而居者不知幾千家悉登此山避賊露宿風吹卒無一人染病者賊亦不敢至此山窺伺足徵仙境之靈仙靈之所式護保護而安全之盜賊疾病俱可無虞也今予解組歸來十餘年矣與鄉老談及仙靈咸思奉祀以報答之僉議



於仙人塘面建屋數楹中塑觀音大士神像左右安設 謝真人並  
 寒山神位約計建宇之費香油之租必須數百緡但千金之裘非一  
 狐所能集萬間之厦非一木所能支尚望士人君子慨然樂助多多  
 益善俾得早竣厥事庶有以妥 仙靈而培田也夫

所有捐題芳名仍當泐石以垂不朽

光緒二十一年二月初三日此仙查謝仙嶂謝真人得道真人名志  
 嘉唐時人

